

Vischraunca  
**Tujetsch**

Cussegli da vischraunca  
2020/2023

## **12. Radunanza dil cussegli da vischraunca**

dil trienni 2020/2023

**mesjamna, ils 15 da settember 2021 allas 20.00 uras  
ella Sala Cristalla a Sedrun (halla plurivalenta Dulezi)**


### **Tractandas:**

1. Avertura
2. Approbaziun dil protocol nr. 11 dils 28 da fenadur 2021
3. Cumpra da parcellas da bagheggiar per la populaziun tuatschina
4. Cumpra da parcellas ella zona da mistregn
5. Orientaziuns
6. Varia

### **Suprastonza communala Tujetsch**

President communal  
Martin Cavegn

Menader center communal  
Simon Collenberg



Vischraunca  
**Tujetsch**

Cussegli da vischraunca  
2020/2023

## **Protocol dil cussegli da vischraunca Tujetsch**

**Nr. 11-2020/23 dils 28 da fenadur 2021**

# **Protocol dil cussegli da vischnaunca Tujetsch**

**Nr. 11/2020/23 dils 28 da fenadur 2021**

**allas 20.00 uras entochen allas 22.00 uras ella Sala Cristalla a Sedrun**

Presidi:	Sabrina Flepp	
Actuar:	Simon Collenberg	
Dumbravuschs:	Simon Beer e Cyril Steiger	
Presents:	10 cusseglierAs, total 10 votantAs ( <i>absolut pli 6</i> )	
Aspectaturs:	6	
Cussegliers/as:	Simon Beer, Rueras Gebharda Berther, Rueras Toni Cathomen, Rueras Otto Curschellas, Sedrun Patric Deragisch, Gionda	Sabrina Flepp, Sedrun Guido Friberg, Sedrun Ignazi Monn, Sedrun Reto Schmid, Sedrun Cyril Steiger, Zarcuns
Suprastanza:	Martin Cavegn, president communal Renato Decurtins, gerau Guido Monn, gerau	Nicole Giossi, geraua Daniel Schmid, gerau
Perstgisas	Arno Berther, cusseglier da vischnaunca Severino Solèr, cumissiun da gestiun	

## **Tractandas:**

1. Avertura
2. Approbaziun dil protocol nr. 10 dils 16 da zercladur 2021
3. Saramentaziun dalla nova commembra dalla suprastanza communal
4. Pratica da miedi a Tujetsch – susteniment finanzial
5. Punt Salins inclus parcadis ella vischinonza – credit d'impegn
6. Orientaziuns
7. Varia

## **1. Tractanda Avertura**

Sabrina Flepp, vicepresidenta dil cussegli da vischernaunca:

Sco vus haveis viu, hai jeu l'honur d'astgar arver l'emprema seduta dil cussegli da vischernaunca dil secund onn dil trienni actual.

Oz ei ina speciala sera, buca mo perquei ch'jeu astgel menar atras quella seduta. Igl ei era ina honur d'astgar salidar la nova commembra dalla suprastanza communal, la Nicole Giossi. Dapi igl onn 2014 cun la demissiun da l'antierira geraua Eveline Soliva, astgein nus puspei suenter 7 onns beneventar ina dunna en suprastanza communal. Quei ei fetg legreivel e motivescha forza ina ni l'autra da far il pass en la politica.

Normalmein sbattin nus da quei temps cun schitgira e calira. Mo uonn ei il cuntrari il cass. Nus havein da sbatter encunter l'aua. Tochen ussa essan nus plitost vegni schanegiai cun donns d'aua e bovas pli grondas en nossa val. En auters loghens sco en Tiaratudestga ni ell'Austria han massa glieud piars siu dacasa ni era confamigliars ed amitgs muort las undaziuns. Tier nus en Svizra ha surtut la garniala caschunau gronds donns. Massa purs da puma e legums ston desister uonn sin in tschuat dalla raccolta.

La midada dil clima metta tut sil tgau. El nord caliras e tier nus tut bletsch. Tgei vulein nus far encunter quella midada climatica? Quella damonda ei dapi entgins onns fetg presenta en la politica mundiala. Mo quei ei buca mo ina damonda politica, era mintgin da nus ei obligaus da sedumandar magari:

- Drovel jeu quei - sto quei propi esser?
- Co fuss ei da viver suenter la stagiu e buca vuler sur gl'entir onn ora farbuns e.a.v?
- In grond pass fuss era gia da cumprar products svizzers e naturalmein cumprar local senza prender gronds viadis sut ils peis.

Sche mintgin da nus po far ina ni l'autra caussa sa quei forsa purtar in levgiament. Il luf ha era puspei mussau presenza e ha scarpau ina massa nuorsas ed auters animals, e quei era tier nus. Lein sperar ch'ins anfli sligiaziuns adattadas en caussa.

Sco davos vi jeu aunc tematisar il tema che fatschenta nus gia dapi l'entschatta digl onn 2020. Buca in di varga senza ch'ins auda dil virus da corona. Ins ha udiu e viu ina massa, surtut en l'economia. Tgi fa gudogns nundetgs e tgi piarda l'esistenza. Jeu creiel per puspei survegnir ina ballantscha en l'entira situaziun stuein nus empruar da viver cun il virus e sias mutaziuns.

## **2. Tractanda Approbaziun dil protocol nr. 10 dils 16 da zercladur 2021**

Il protocol nr. 10 dils 16 da zercladur 2021 vegn approbaus unanimamein.

## **3. Tractanda Saramentaziun dalla nova commembra dalla suprastanza communal**

Sabrina Flepp, vicepresidenta dil cussegli da vischernaunca:

A caschun dall'elecziun communal da dils 25 d'avrel 2021 ei Nicole Giossi vegnida elegida sco geraua. Jeu suppliceschel Tei d'engirar avon Diu da vuler ademplir tuttas obligaziuns digl uffeci tenor meglier saver e puder.

Nicole Giossi, geraua:

Jeu engirel avon Diu ch'jeu vegnel ad ademplir tuttas obligaziuns digl uffeci tenor meglier saver e puder.

#### **4. Tractanda                    Pratica da miedi a Tujetsch – susteniment finanzial**

Presentaziun dalla tractanda entras Martin Cavegn, president communal:

Igl atun 2019 ha il mieri dr. Andreas Fischbacher informau la suprastanza communalia ch'el mondi bein-  
gleiti en pensiun. Silsuenter han differents discours cun el e cun ils cussegliaders dall'interpresa Griso-  
med SA, ina firma specialisada arisguard igl agir tier la tscherca d'in mieri, giu liug. El decuors dil de-  
cember ha la suprastanza communalia incaricau la Solida Treuhand AG d'elavurar in concept da realisa-  
ziun per la pratica da mieri ch'ei vegnius suttamess l'entschatta fevrer 2021 al cussegl da vischnaunca  
per approbaziun. Suenter ch'il cussegl da vischnaunca ha dau il consentiment pigl agir descret el con-  
cept ei la suprastanza communalia ida beinspert silla tscherca d'in mieri. Sin pliras paginas d'internet en  
Svizra ed egl exteriur ein inserats vegni publicai, medemamein il concept per la realisaziun d'ina pratica  
da mieri. Sin fundament digl inserat ed il concept havein nus retschiert pliras annunzias ch'ein allura  
vegnidas examinadas el detagl. El decuors dalla primavera 2021 han ils emprems discours cun la fami-  
glia Schnabel giu liug. La media dr. Kristina Schnabel e siu um Rudolf Schnabel han visitau la visch-  
naunca da Tujetsch per mirar sche quei liug vegn insumma en damonda per els. Els han spért anflau  
plascher vid Tujetsch sco liug da dimora. In impurtont punct el rom dalla decisiun ei il gimnasi a Mustér  
staus, ch'in da lur buobs vegn a frequentar. Actualmein ein tuttas lubentschas avon maun, aschia che la  
famiglia sa prender dimora a Tujetsch. Dunna Schnabel entscheiva igl uost a luvrar sco assistenta tier  
dr. Andreas Fischbacher. El decuors digl unviern 2022 vegn ella a surprender la bitgetta dalla pratica.

La casa en Tiaratudestga ha la famiglia saviu vender e cheutras finanziar la cumpra digl object dad An-  
dreas Fischbacher. La pratica basegna denton ina sanaziun ed ultra da quei eisi necessari d'acquistar in  
niev inventari. Ils daners per quei intent mauncan denton a dunna Schnabel. Ord quei motiv damonda  
ella la vischnaunca per ina summa da frs. 320'000.- destinada per la sanaziun dalla pratica e la cumpra  
da novas mobilias ed apparaturas fermas sco era per in emprest per la cumpra digl inventari (frs.  
40'000.-).

La purschida dil mieri ei fetg impurtonta per indigens sco era pils hospes. Nus essan satisfatgs da ver  
anflau ina persuna qualificada per la pratica da mieri. Igl ei giustificau d'impunder quella summa daners  
per garantir egl avegnir il survetsch medicinal en vischnaunca. La pratica da mieri ei era ina purschida  
publica, la quala in e scadin sa nezegiar. Era sco liug turistic eisi impurtont da ver in pratica moderna  
che ademplescha las pretensiuns dad ozildi. Jeu vi en quei connex menziunar che la vischnaunca ha in  
dretg da precumpra, priu il cass che dunna Schnabel venda enzacu l'immobilia. Quei ei aunc impurtont  
da saver.

#### **Debatta d'entrada:**

Ei dat negina debatta d'entrada.

#### **Tractazion:**

Otto Curschellas, cusseglier da vischnaunca:

Da cattar in mieri ei ozildi veramein buca sempel. Legreivlamein havein nus anflau ina persuna adatta-  
da. Nus havevan previu da metter a disposiziun ina summa denter frs. 1 milliun e frs. 2 milliuns sin fun-  
dament dil concept per la realisaziun d'ina pratica da mieri. La finamira ei d'impunder aschi paucs da-  
ners sco pusseivel - quella havein nus contonschiu cun la summa da frs. 320'000.- (*contribuziun unica*)  
ed igl emprest da frs. 40'000.-.

Jeu hai ina damonda da capientscha: Tgei munta in dretg da precumpra senz'indemnisaziun exactamein?

Martin Cavegn, president communal:

Quei munta che la vischnaunca ha in dretg da precumpra sin l'entira immobilia senza stuer pagar enzatgei persuenter. Usitadamein cuosta in tal dretg denter frs. 20'000.- e frs. 50'000.-. Il grond avantatg ei, sche la famiglia Schnabel banduna enzacu Tujetsch, sa la vischnaunca trer a néz sco emprem il dretg da precumpra sin l'immobilia ed aschia encuir ina nova sligiaziun per garantir vinavon il provediment medicinal da basa.

Guido Friberg, cusseglier da vischnaunca:

Igl ei plascheivel d'haver anflau en aschi cuort temps ina miedia sco successura.

Medemamein astgein nus tschintschar da cletg che la nova miedia ei veginida da surdar respectiv da vender en aschi cuort temps sia pratica e siu dacasa en Tiaratudestga. Quei fatg ha bein levgiau che la miedia ha saviu acquistar persunalmein igl entir object dil mieri Andreas Fischbacher e ha cheutras reduciu la damonda da sustegn ed engaschi dalla vischnaunca.

La suprastanza propona oz da conceder in susteniment a-fonds-perdu per la renovaziun dalla pratica sco era in credit pigl inventari. In susteniment mettel jeu buca en damonda sin fundament dil fatg ch'ei vegin giavischau dalla populaziun da procurar per in survetsch medicinal en vischnaunca sco era sin fundament dil dretg da precumpra senza indemnisiaciun.

Tuttina selubeschel jeu da metter entgins patratgs en discussiun, ils quals ein sedai duront il studi dil messadi. Jeu mondol da quei anora che l'immobilia ei veginida vendida pil prezi da marcau, risguardond la vegliadetgna digl object e da siu indrez. En quei senn duess ina renovaziun basigneivla da principi gia esser risguardada el prezi. Il susteniment duei pia buca favorisar ina partida ni l'autra, mobein esser in néz giustificau per tuttas partidas. Cunquei che la vendita ei succedida da privat a privat havein nus ne-gina investa els detagls. Pertuccott la renovaziun ed il dretg da precumpra duessen ils detagls denton silmeins esser enconuschents alla suprastanza communalia ed els duein vegin risguardai comensuradamein el contract da precumpra. Tgei ei stau il motiv da fixar ina summa a-fonds-perdu da frs. 320'000 ed in emprest da frs. 40'000? Ei dess gie era la pusseivladad da conceder in credit senza tscheins, cun ina segirtad, sur l'entira summa e da desister sin in dretg da precumpra. Tenor mia savida ha per exemplu la vischnaunca Lumnezia susteniu en fuorma semeglionta, la vischnaunca da Breil perencunter ha dau in susteniment sulettamein en fuorma da credit.

Pertuccott il dretg da precumpra senza indemnisiaciun sco era il cuoz dil dretg ch'ei buca limitaus ha il president Martin gia dau l'informaziun. Ina secunda damonda haei schebein la summa a-fonds-perdu vegin risguardada en ina fuorma ni l'autra el dretg da precumpra.

Martin Cavegn, president communal:

La contribuziun unica vegin buca risguardada el dretg da precumpra ed ei era buca ligiada vid in spazi. Jeu vi explicit menziunar che nus stein en concurrenza cun autres vischnauncas puncto la tscherca d'in mieri. Nus havein era vuliu setener vid il susteniment offerius el concept per la realisaziun d'ina pratica da mieri che cumpeglia buca ina tala regulaziun speciala. Nus savein buca semplamein adattar quellas prestaziuns da susteniment, quei fass buca gest visavi la famiglia Schnabel.

## Votaziuns:

a) Il cusségl da vischonaunca decida unanimamein da conceder a dunna Schnabel ina contribuзиun unica ella summa maximala da frs. 320'000.- per la sanaziun dalla pratica da miedi e per las mobilias ed eventualas apparaturas fermas sut la cundiziun che la vischonaunca obtegn in dretg da precumpra per l'entira immobilia senza in'indemnisaziun.

b) Il cusségl da vischonaunca decida unanimamein da conceder a dunna Schnabel in emprest (buca segiraus) ella summa maximala da frs. 40'000.-. Dunna Schnabel ei obligada da pagar anavos igl emprest sur in spazi da treis onns. L'emprema rata ha da succeder entochen ils 31 da decembre 2022.

Las fatschentas (a e b) vegnan suttamessas al referendum facultativ (*art. 17 alinea b dalla costituziun communala*).

## 5. Tractanda Punt Salins inclus parcadis ella vischinonza – credit d'impegn

Presentaziun dalla tractanda entras Martin Cavegn, president communal:

Actualmein essan nus fatschentai cun la revisiun dalla planisaziun locala. En connex cun quella planisaziun previn nus da legalisar ils parcadis sper la staziun da partenza dalla pendiculara Salins-Cuolm da Vi. Ultra da quei havein nus l'intenziun da construir novs parcadis sper la staziun dall'antieriura sutgera Sedrun e medemamein legalisar quels eifer la planisaziun locala.

La procedura da perimeter dalla Via Valtgeva vegnin nus proximamein ad arver da niev respectivamein a repeter, damai che las Pendicularas da Mustér han uss era in grond néz vid quella via. Aschia vegnan ils cuosts reparti danovamein.

La punt Salins ei da gronda necessitat pil traffic plaun. Las Pendicularas da Mustér han investau rodund frs. 40 milliuns el territori da skis, la gronda part per la pendiculara Cuolm da Vi. Ultra da quei pagan las pendicularas annualmein rodund frs. 50'000.- alla vischonaunca, quei per differents dretgs e taxas. Uss essan nus, la vischonaunca dumandada, da sligiar ils problems cul traffic plaun a Salins, denter auter cun ereger ina punt a Salins.

Era la situaziun arisguard ils parcadis ei malcunteentevla a Salins. Per l'ina ein ils parcadis sper la staziun da partenza buca aunc legalisai. Per l'autra han las Pendicularas Mustér SA da porscher parcadis per l'ustria previda a Cuolm da Vi (*1 parcadì per 5 plazs da seser*). El connex cun il project ei ina cunvegna supplementara denter la vischonaunca e las pendicularas vegnida stipulada. Tenor quella ein las Pendicularas Mustér obligadas da metter a disposiziun rodund 40 parcadis. Cun construir certs parcadis sper l'antieriura sutgera a Cungieri e schar a tscheins tals allas Pendicularas Mustér savein nus cuvierer quella munconza dils parcadis.

La suprastanza communal vegn a conceder provisoricamein la lubientscha per parcar sper la staziun da partenza a Salins-Cuolm da Vi e sper la staziun dalla sutgera a Cungieri entochen che la nova planisaziun locala entra en vigur. Quels parcadis vegnan allura legalisai entras l'approbaziun dalla revisiun dalla planisaziun locala e cun la decisiun finala dalla regenza dil cantun Grischun.

Presentaziun dalla tractanda entras Guido Monn, gerau:

L'idea da construir ina senda da spassegiar ei già naschida avon quater onns. La senda meina naven da Bugnei entochen sil Pass Alpu ed ei colligiada cullas staziuns dil tren. La punt a Salins ei in element dalla senda. Ultra da quei colligia la punt la staziun da partenza a Salins cun las ulteriuras sendas da viandar e bike.

La punt vegn construida sin fundaments dretg e seniester dil vau e senza pilasters. Sut la punt exista la pusseivladad da pender vidlunder bischels per colligiaments d'aua, energia, canalisaziun eav. La punt vegn baghegiada ord materials buca brischonts, quei muort la resca d'incendis da fiug.

En connex culla construcziun dalla punt stattan pliras finamiras. Per l'ina vulan ins migliurar igl access alla pendiculara per las sendas da viander e bike. Ultra da quei ei la punt in punct da colligiaziun dalla senda da spassegiar Bugnei – Pass Alpu. Era savein nus procurar aschia per in cumadeivel access naven dalla pendiculara Salins – Cuolm da Vi als parcadis previ sper l'anteriura sutgera Cungieri.

Ils cuosts da construcziun per la punt muntan a frs. 357'000.-. Ina cumpart (frs. 52'000.-) da quella summa ei previda per la realisaziun dils parcadis sper l'anteriura staziun dalla sutgera Cungieri. Ils parcadis vegnan construi cun ina cuvrida da material fin.

### **Debatta d'entrada:**

Reto Schmid, cusseglier da vischnaunca:

Igl onn 2019 han ils habitants sco era hospes da Tujetsch retschiert quasi gratuitamein ina grondiusa purschida turistica cun la realisaziun dalla pendiculara Salins-Cuolm da Vi.

Ina purschida che porscha a nus en nossa vallada in secund access en in territori da skis. Vinavon era ina bellezia purschida da stad cun diversas pusseivladads da viandar sco era in interessant territori dad ir cun bike.

Vinavon astgein nus menziunar ch'era l'offerta da gastronomia a Cungieri e Cuolm da Vi rundescha giu ina buna purschida.

Ina buna purschida ch'ei denton buca aunc cumpleina. Ed exact sur dalla purschida che maunca aunc ussa havein nus oz da debattar. La punt Salins cun ils parcadis planisai sco era la legalisaziun dils parcadis a Salins ein ina part fetg essenziala da quei mosaic turistic sin la costa dil Cuolm da Vi.

La punt da Salins ei ina purschida che levgiescha bein ad enqualina famiglia sco era a personas pli passadas igl access final el liug da partenza tier la staziun a val dalla pendiculara Salins. Ston ins aunc ussa prender la via engiuviers la punt dil tren ch'ei bia memia stretga per carrar cun crotschas e velos viaden tier il suppassadi a Valtgeva e naven da leu aunc entochen tier la staziun a Val, drovan ins segiramein cun affons da quei da 20 entochen 30 minutus dapli.

Vinavon han ins viu dapi l'avertura da quella purschida ch'ils parcadis ein era in punct fleivel. Cun legalisar ils parcadis a Salins, baghegiar la punt da Salins e cun reactivar e completar ils parcadis dalla staziun a val dall'antieriura sutgera Cungieri survegnin nus ina stupenta e completa purschida.

Ultra da quei creiel jeu che cun quei signal viers igl investur Markus Weber demussein nus che nostra vischnaunca vul esser in bien partenari dad el. Quei ei in fetg impurtont signal che nus savein tarmetter oz enviers Mustér, in signal che savess haver per consequenza ulteriuras investiziuns sco la nova ustria sil Cuolm da Vi che vegness segiramein a caschunar investiziuns da plirs milliuns francs. Ed era gliez procurass segiramein per in cert profit per ina u l'autra interpresa indigena.

Gebharda Berther, cussegliera da vischnaunca:

Cun la punt Salins savein nus contonscher pliras finamiras ord vesta dil turissem. Quella punt ei segiramein da necessitat. En connex cun la realisaziun dalla pendiculara Salins-Cuolm da Vi ha la vischnaunca stipulau ina cunvegna arisguard ils parcadis necessaris. Jeu citeschel il suandont text ord il protocol dil cussegli da vischnaunca dils 14 da fevrer 2018:

*"Daco e cun tgei cumpart ston las Pendicularas Mustér SA separticipar vid las investiziuns necessarias ell'infrastructura? Tgei scriva la lescha avon? Nua ei il prinzip dil caschunader reglaus?*

Igl Uffeci per il svilup dil territori dil cantun Grischun ha relaschau ina directiva che regla il prinzip dil caschunader dils cuosts. La directiva scriva avon che las Pendicularas Mustér SA ston construir parcadis, damai ch'ellas ein avisai sin tals sin fundament dil menaschi dalla pendiculara. Las pendicularas da Mustér ein consequentamein il caschunader dils cuosts.

Ina fetg impurtonta cumponenta dalla fatschenta ei era la cunvegna supplementara. Quella sto vegnir suittascreta dallas Pendicularas Mustér SA, schiglioc vegnan ils dretgs buca concedi. La cunvegna supplementara regla la construcziun dils parcadis pil surpli dil traffic che seresulta culla nova pendiculara, la contribuziun dallas Pendicularas Mustér SA vid l'infrastructura da basa per la colligaziun dils territoris da skis sco era las tariffas pils territoris da skis. Jeu mondèl cuort en sils impurtonts puncts da quella cunvegna.

Las Pendicularas Mustér SA ein sin fundament dalla lescha da baghegiar communalas obligadas da construir parcadis pil surpli dil traffic. Las Pendicularas Mustér SA sincereschan da construir parcadis, sche pusseivel datier dalla staziun a Salins, aschia ch'ils hosps dalla pendiculara san contonscher tals a pei. Eisi buca pusseivel da construir parcadis datier dalla staziun a Salins, sa la vischnaunca ordinar las Pendicularas Mustér SA da baghegiar en in auter liug parcadis ed organisar naven da leu in survetsch da transport entochen a Salins. Las Pendicularas Mustér SA han da pagar ina taxa da cumpensaziun enstagl dalla construcziun dils parcadis, sch'igl ei objectivamein buca pusseivel da construir ils parcadis.

La Viasier Matterhorn Gotthard preveda da construir in surpassadi alla staziun da Sedrun. Quei surpassadi ei medemamein da grond avantatg per ils hosps che caminan tier la staziun dalla nova pendiculara a Salins. Ord quels motivs ha la suprastanza communalas stipulau ella cunvegna che las Pendicularas Mustér SA ein obligadas da separticipar vid ils cuosts da construcziun dil surpassadi. La cumpart da participaziun vegn aunc definada pli tard. La Viasier Matterhorn Gotthard preveda medemamein da sanar ils proxims onns la punt sur il Bogn Sedrun e construir ina nova passarella pils pedunzs, semegliont sco tiel viaduct ella Val Bugnei. La passarella vegn nezegiada dils hosps che caminan tier la staziun dalla nova pendiculara a Salins. Ord quels motivs ha la suprastanza communalas stipulau ella cunvegna che las Pendicularas Mustér SA ein obligadas da separticipar vid ils cuosts da sanaziun da quella punt. La cumpart da participaziun vegn aunc definada pli tard."

## Tractaziun:

Gebharda Berther, cussegliera da vischnaunca:

Ella cunvegna eisi stipulau che las pendicularas da Mustér han da suprender ils cuosts per la construcziun dils parcadis. Constat quei?

Martin Cavegn, president communal:

La situaziun arisguard ils parcadis ei buca reglada el detagl ella cunvegna. Sper l'antieriura sutgera Cungeri preveda la vischnaunca da construir parcadis. Las Pendicularas Mustér SA han la pusseivladad da far diever da quels parcadis. Persuenter vegn incassau in tscheins d'affittaziun. Il diember dils parcadis che las Pendicularas da Mustér SA basegnan pil menaschi dalla pendiculara e l'ustria previda, ei pil mument aunc buca enconuschents.

Ignazi Monn, cusseglier da vischnaunca:

Sur dalla punt stuein nus buca discussiunar – quella ei necessaria. En connex cun la realisaziun dils parcadis sper l'antieriura sutgera eisi da quintar cun problems sin la Via Pitgmun, damai ch'il traffic vegn a crescher. Nus astgein buca emblidar che tschun vias secruschan ella vischinanza dalla Tgès'Alva. Era ord vesta dalla segirtad vi jeu far attents vus sin quella situaziun. Sin quella via ein numnadamein sper

automobilists era pedunzs da viadi. Priu il cass ch'ils parcadis sper l'anteriura staziun dalla sutgera Cungieri vegnan construi, eisi impurtont che la rumida da neiv funcziuneschi detg bein.

#### Votaziun:

**Il cussegl da vischnaunca decida unanimamein da conceder in credit d'impegn ella summa da frs. 357'000.- per la construcziun dalla punt Salins e la realisaziun dils parcadis ella vischinonza dall'anteriura staziun da partenza dalla sutgera Cungieri.**

***La fatschenta vegn suttamessa al referendum facultativ (art. 17 alinea b dalla constituziun comunala).***

#### 6. Tractanda Orientaziuns

Martin Cavegn, president communal:

Pil mument essan nus vid preparar differentas fatschentas, cun las qualas il cussegl da vischnaunca ha da sefatschentar proximamein.

Guido Monn, gerau

Las lavurs vid il plaz Drun ch'eran previdas la primavera (matg), ein vegnidas spustadas sin la fin d'uost 2021. Il motiv persuenter ei che l'interpresa da catram ha stuiu spustar bia lavurs muort las malauras e ha aschia buca saviu catramar duront il termin fixau la primavera.

Il project dil Bogn Sedrun s'avonza. Nus havein puspei giu pliras sedutas. La calculaziun definitiva dils cuosts ei aunc buca avon maun. El decuors digl atun savein nus dir con ch'ils cuosts muntan.

#### 7. Tractanda Varia

Toni Cathomen, cusseglier da vischnaunca:

La fiera dil vitg ei ina bona idea – in grond cumpliment persuenter. Jeu hai gia visitau duas gadas quella fiera. Tgei marscha tier il project dalla Tgèsa s. Vigeli?

Martin Cavegn, president communal:

Il concept per l'utilisaziun dalla Tgèsa s. Vigeli sco nova dimora dalla Casa Soldanella ei vegnius inoltraus tier il cantun. Uss spitgein nus sin il resun dils responsabels digl uffeci cumpetent.

Toni Cathomen, cusseglier da vischnaunca:

Igl ei vegniu comunicau ch'ei detti ina decisiun en connex cul resort a Dieni la fin matg. Co vesa ei ora tier quei project?

Martin Cavegn, president communal:

Il matg ei il project vegnius tractaus el cussegl d'administraziun. Muort ils cuosts ei quel vegnius redimensiunaus. La decisiun ei vegnida spustada entochen che las cefras indicativas pil menaschi dil resort ein avon maun.

Il settember 2022 cuora la lubentscha pil resort a Dieni giu. Uss eisi da sclarir, schebein la vischnaunca ei legitimada da prolongir quella lubentscha e co quei duei succeder.

Jeu mon da quei anora ch'ina decisiun definitiva arisguard il project croda il settember/october.

Gebharda Berther, cussegliera da vischnaunca:

Il moloc a Rueras vegn appreziaus fetg. Quel fa ina buna pareta e s'accorda bein cul liug. Ei retracta d'in fetg schuber sistem. Jeu vi far in cumpliment persuenter.

Reto Schmid, cusseglier da vischnaunca:


Il cudischet da vacanzas cumpara mintga sesiun pli e pli tard. Uonn ei quel cumparius ils 10 da fenadur 2021. Allura han las vacanzas gia daditg entschiet. Jeu suppliceschel vus da tener cheu il det sissu e da procurar che quei cudisch cumpari mintgamai baul avunda.

actuar:

Simon Collenberg

vicepresidenta:

Sabrina Flepp



Vischnaunca  
**Tujetsch**

Cussegli da vischnaunca  
12-2020/2023

## **Cumpra da parcellas da baghegiar per la populaziun tuatschina**

### **Messadi**

dalla suprastonza communalia al cussegli da vischnaunca

Preziale president  
Preziadas cusseglieras  
Preziai cussegliers

## 1. Situaziun da partenza

L'intenzion dalla suprastonza communalia ei da cumprar parcellas da bagheggiar per metter a disposiziun alla populaziun tuatschina en dretg da bagheggiar per surbagheggiar. Pliras persunas giuvnas e famiglias han breigias da cattar ina parcella da bagheggiar. In motiv persuenter ei che la maioritad dils proprietaris da parcellas ein buca promts da vender las parcellas e tegnan quellas sur onns ora en atgna proprietad. La vischerna ha gia mess a disposiziun differentas parcellas en dretg da bagheggiar, denter auter ils onns 1990 a Spinatscha. Quei model ei secumprovaus.


Il model porta per la vischnaunca da Tujetsch sco era per las persunas che prendan si ina parcella en dretg da baghegiar plirs avantatgs. La vischnaunca possibilitescha aschia a persunas da baghegiar a Tujetsch e da vegnir sesentas en vischnaunca. Quellas persunas ston pia buca finanziar la cumpria dalla parcella e san aschia impunder quels daners per la construcziun dalla casa – in levgiament finanzial che vegn segiramein ad engrau a beinenqualina famiglia, specialmein a famiglias giuvnas. Perencunter daventa la vischnaunca possessura da pliras parcellas e sa incassar annualmein ils tscheins per las parcellas concedidas en dretg da baghegiar.

En cass che l'Andermatt Swiss Alps SA (ASA) decida el decuors dils proxims meins ch'il resort a Dieni vegn realisaus, prognostischescha la suprastonza communalia in augment tier ils prezis da cumpra dals parcellas, damai che la damonda suenter talas vegn a crescher. Tier in tal scenari vegnan las personas indigenas a ver breigias da finanziar la cumpra d'ina parcella da bagheggiar. Sin fundament da quella prognosa vul la suprastonza communalia comprar uss las parcellas e segirar talas per la populaziun tuatschina. La suprastonza communalia vul numnadamein evitar ina situaziun sco ella sepresenta vi Andermatt, nua che las investiziuns dall'ASA el resort han procura per in augment considerabel tier ils prezis e nua ch'igl ei buca pli pusseivel pils indigena da bagheggiar el vitg ni ordeifer. Quei astga buca era capitlar en vischnaunca da Tujetsch.

En in proxim pass eisi previu da cumprar ulteriuras parcellas. La suprastonza communal vegn a dar a tuti proprietaris da parcellas da baghegiar la pusseivladad dad inoltrar ina offerta per la vendita da lur parcellas. Il temps per l'inoltrazion dallas offertas vegn publicaus el decuors digl atun ella Tuatschina.

## **2. Cumpra dallas parcellas da baghegiar**

**Parcella nr. 1149**



La parcella nr. 1149 secatta sper la Via Alpu sut il quartier da Niregl. La suprastonza communalha retschiert differents resuns ch'ei seigi ina sfida da cattar ina habitaziun adequata a Tujetsch. Muort quei motiv preveda la suprastonza communalha da surdar quella parcella en dretg da baghegiar ad ina societad cooperativa per la construcziun da casas e habitaziuns (Wohnbaugenossenschaft). Ei fuss nizeivel da baghegiar ina casa cun tschun entochen siat habitaziuns da 5.5 combras entochen 6.5 combras, damai che quella grondezia corrispunda ozildi als basegns e giavischs dallas famiglias. La parcella ei situada en in central liug gest sper la via principala. Igl ei pusseivel da construir il baghetg datier dil cunfin dalla via e realisar enquiyolars in grond curtin cun

urdeins da giugar pils affons. Tier il model cun la societad cooperativa cumpran las famiglias buca las habitaziuns, mobein separticipeschan finanzialmein alla societad. Persuenter san ellas prender a tscheins las habitaziuns per in pli favoreivel prezi respectivamein cumprar il dretg d'utilisaziun sin in temps nunlimitau. Pliras persunas sesentas a Tujetsch muossan interess per in tal ni semegliont project. La suprastonza communala va da quei anora che ulteriurs interessents vegnan a s'annunziar, priu il cass che la surbaghegiada vegn realisada. Ei podà ch'il project vegn era ad attrer famiglias d'ordvart da Tujetsch. Ina surbaghegiada vegn pér realisada, cura ch'ils interessents han dau il consentiment persuenter.

**Surfatscha:** 1879 m<sup>2</sup>

**Zona actuala:** Zona da habitar H3

**Prezi da cumpra (offerta):** frs. 526'120.- (frs. 280/m<sup>2</sup>) ed ils cuosts dil geometer e dil cudisch funsil

### Parcella nr. 681

La parcella nr. 681 secatta sper la staziun dil tren a Sedrun.



Pil mument ei ina interresa interessada vid la parcella nr. 681, la quala vuless bugen realisar ina surbaghegiada. Quella parcella secatta datier dalla staziun ed ei aschia era per in project communal da grond nez. La vischerna vegn a sclarir suenter la cumpra ils interess da quella firma ed era il nez per la populaziun.

La parcella sa ord vesta dalla vischerna vegnir en damonda per differents projects. Per l'ina savess la vischerna sligiar la munconza da parcadiis en quella vischinonza cun realisar ina garasca sutterrana sin quella parcella e sisuren ina surbaghegiada. Per l'autra eisi pusseivel da nezegiar la parcella el rom dalla formaziun dalla staziun a Sedrun.

La staziun da Sedrun vegn sanada igl onn 2023. Sco igl ei enconuschent al pievel tuatschin eisi previu da bagheggiar in sutpassadi. En quei connex vul la supratonza communal nezegiar la caschun e schar construir in sutpassadi che colligia la senda che meina siadora dalla Via Detervitgs cul sutpassadi dalla staziun a Sedrun.



Cheutras vegn igl access pils pedunzs alla staziun migliuraus ed ei aschia pli cumadeivels. Pil mument vegn il teppi rullont projectau, dil qual ils pedunzs savessen far diever naven dalla Via Dentervitgs entochen al sutpassadi, buca realisaus. Ils cuosts da construcziun per quei indrez ein memia aults.

Concludend savein nus dir ch'igl ei ord vesta strategica da grond avantatg da cumprar quella parcella. La vischerna ei libra tgei ch'ella fa finalmein cun quei sulom. Davart l'utilisaziun dalla parcella decidan il davos ils basegns communals e dil pievel sco era l'interessenza davart dils investurs che vulan realisar in project. Suandontas pussevladads sedattan per la vischerna: U metter la parcella en dretg da bagheggiar per la construcziun da casas pils indigens, dar giu tala en dretg da bagheggiar per la realisaziun d'in project ni nezegiar la parcella per in agen intent communal. Ina autra opziun ei da vender la parcella cun in gudogn, quei denton pér suenter haver consultau il pievel tuatschin.

**Surfatscha:** 2121 m<sup>2</sup>

**Zona actuala:** Zona ulterior territori communal.

**Prezi da cumpra (offerta):** frs. 678'720.- (frs. 320.- /m<sup>2</sup>) ed ils cuosts dil geometer e dil cudisch funsil

## Parcella nr. 523



La parcella nr. 523 ei situada a Camischolas sut la Via dalla Staziun. Quella parcella preveda la suprastonza communal da surdar ad indigens en dretg da baghegiar per construir duas entochen treis casas. Cheutras sa la suprastonza segidar cun las personas che cattan pil mument buca ina parcella per surbaghegiar.

**Surfatscha:** 890 m<sup>2</sup>

**Zona actuala:** Zona per l'utilisaziun da construcziun el futur

**Prezi da cumpra (offerta):** frs. 249'200.- (frs. 280/m<sup>2</sup>) ed ils cuosts dil geometer, da perimeter (Via Strem/ Via dalla Staziun) e dil cudisch funsil

### 3. Situaziun finanziaria

La damonda che setschenta en connex cun quella fatschenta ei sche la vischnaunca dispona dalla liquidat necessaria per cumprar las parcellas menziunadas. Quei il cass – la liquidat ei dada. La situaziun finanziaria dalla vischnaunca Tujetsch vegn giudicada pil mument dalla suprastonza communal sco ordvart buna - la liquidat schai sin in bien nivel.

Igl ei era explicit da menziunar ch'ei retracta tier quella fatschenta sulettamein d'in transfertment dils mieds liquids ella facultad finanziaria. Cun la cumpra dallas parcellas vegnan ils mieds liquids sminui ed enstagl da daners sin banca posseda la vischnaunca suloms da baghegiar. La facultad finanziaria s'augmenta aschia (stan actual: frs. 3'744'135.-) per rodund frs. 1.5 milliuns (prezi da cumpra dallas parcellas). Per quell'investizion sto la vischnaunca buca prender si daners dalla banca e far supplementar-mein deivets a liunga vesta.

Sco proxim grond project ha il pievel tuatschin da decider davart la realisaziun dil project Bogn Sedrun (sanaziun ed engrondaziun). Tenor las calculaziuns actualas semovan ils cuosts sin rodund frs. 11 milliuns. Per finanziar quei project ei la vischnaunca sfurzada da lu prender si capital jester (emprests). Con ditg che la vischnaunca ha da pagar anavos quels emprests ed ils ulteriurs deivets existents da frs. 7 milliuns schai vid l'altezia dils cashflows che la vischnaunca contonscha ils proxims onns el rom dils quens annuals.

La cumpra dallas parcellas proponidas ha negina influenza sin la finanziaziun dalla sanaziun dil Bogn Sedrun.

#### **4. Posiziun dalla suprastonza communal**

La finamira principala en connex culla cumpra dallas parcellas ei da segidar cun la populaziun da Tujetsch e da possibiliter als interessents da bagheggiar casa en vischnaunca. Igl ei semussau ils davos onns ch'igl ei ina gronda sfida da cattar ina parcella per surbagheggiar en vischnaunca. Era plirs investurs ein adina puspei sin la tscherca da parcellas per realisar projects (hotels ni surbaghegiadas cun habitaziuns administradas) e han breigias da cattar in sulom adattau. Sco gia menziunau pliras gadas ei la purschida da habitaziuns grondas avunda per famiglias malcuntenteivla a Tujetsch. Famiglias sco era persunas giuvnas han breigias d'anflar ina habitaziun che cuntenta lur basegns e giavischs. Cun la realisaziun d'ina casa cun habitaziuns, oravontut per famiglias, savein nus migliurar quella situaziun ed aschia possibiliter a quellas persunas da prender dimora a Tujetsch.

La suprastonza communal spera ch'il cussegli da vischnaunca e la radunanza communalia dettien il consentiment per la cumpra da quellas parcellas, aschia che la vischnaunca sa offerir egl avegnir als indigens pliras pusseivladads per surbagheggiar sin intschess communal. Cheutras sa la vischnaunca crear las condizioni da basa ed aschia era promover ch'ei vegni bagheggiu a Tujetsch.

#### **5. Propostas**

Sin fundament dallas ponderaziuns surnumnadas propona la suprastonza communalia al cussegli da vischnaunca ed alla radunanza communalia:

- a) da cumprar la parcella nr. 1149 pil prezi da frs. 526'120.- e supreender ils cuosts dil geometer e dil cudisch funsil en connex cun la cumpra.**
- b) da cumprar la parcella nr. 681 pil prezi da frs. 678'720.- e supreender ils cuosts dil geometer e dil cudisch funsil en connex cun la cumpra.**
- c) da cumprar la parcella nr. 523 pil prezi da frs. 249'200.- e supreender ils cuosts dil geometer e dil cudisch funsil e connex cun la cumpra sco era ils cuosts da perimeter (*Via Strem/ Via della Staziun*).**

*Las fatschentas (a-c) vegnan aunc suttamessas alla radunanza communalia.*


#### **Suprastonza communalia Tujetsch**



President communal:  
Martin Cavegn



Menader center communal:  
Simon Collenberg



Vischnaunca  
**Tujetsch**

Cussegli da vischnaunca  
12-2020/2023

## **Cumpra da parcellas ella zona da mistregn**

### **Messadi**

dalla suprastonza communalia al cussegli da vischnaunca

Preziaz president  
Preziadas cusseglieras  
Preziai cussegliers

## **1. Situaziun da partenza**

Las interpresas indigenas da construcziun basegnan spazi per deponer lur material, lur vehichels e maschinas ella zona da mistregn. La suprastonza communal vul metter a disposizion il spazi necessari cun la cumpra dalla parcella nr. 3057 e dalla parcella nr. 1916 dall'AlpTransit Gotthard SA (ATG). Las parcellas secattan giul Drun (*mira grafica sin prox. pagina*).

Cun la cumpra dallas parcellas sa la suprastonza communal crear bunas condiziuns da basa per las interpresas. Medemamein vegnan las interpresas da baghegiar obligadas da sligiar si ils ulterius plazs da deposit ch'ein situai sin igl ulterieur intsches communal e da nezegiar per quei intent sulettamein la zona da mistregn. Da l'autra vart ei quei era per la vischnaunca ina pusseivladad d'incassar in tscheins d'affittaziun annual per las parcellas dallas interpresas da construcziun. Cun ils tscheins annuals denter frs. 15'000.- e frs. 20'000.- eisi pusseivel da refinanziar la cumpra enteifer in temps da rodund 20 onns.

## **2. Stadi actual – engrondaziun dalla zona da mistregn**

A caschun dalla votaziun communal dils 20 da decembre 2015 ha il pievel tuatschin approbau cun 122 vuschs encunter 17 vuschs la revisiun parziala dalla planisaziun locala e la lescha da baghegiar. L'engrondaziun dalla zona da mistregn ei medemamein ina componenta da quella fatschenta. Per l'ina ei quella previda el vest (parcella nr. 3057 dall'ATG), cunfinont cun la zona da mistregn existenta. Per l'autra eisi planisau dad engrondir quella (ina part dalla parcella nr. 1776) egl ost. La parcella nr. 1776 ei gia en proprietad dalla vischnaunca, aschia che la disponibladad ei garantida. El messadi per la votaziun communal haveva la suprastonza communal gia menziunau da lezzas uras ch'ella prevedi d'acquistar la parcella nr. 3057 dall'ATG.

Cul conclus nr. 71 dils 5 da fevrier 2019 ha la Regenza Grischuna sistiu la procedura d'approbaziun concernent l'engrondaziun dalla zona da mistregn (MI) e spustau quella silla secunda fasa d'approbaziun. Quei ei succedi muort damondas da basegns ch'ei aunc aviartas suenter haver consultau la vischnaunca. La procedura d'approbaziun per la zona da mistregn (MI) vegn puspei lantschada el rom dalla secunda fasa d'approbaziun.

Pil mument ein las parcellas nr. 1916 e nr. 3057 sco era ina part dalla parcella nr. 1776 indicadas sco ulteriur terren communal. Sin ulteriur terren communal ein projects da construcziun lubi ils quals adempleschan las premissas en connex cun ina lubientscha excepcionala per stabiliments ed edifecis ordeifer la zona da baghegiar (BAB). El rom dalla revisiun dalla planisaziun locala currenta eisi previu d'attribuir la part cumpigliada dalla parcella nr. 1776 alla zona d'administraziun da material, la parcella nr. 1916 alla zona da mistregn e la parcella nr. 3057 alla zona da deposits.


En ina zona da deposits eisi tenor la lescha da baghegiar lubiu da deponer a moda ordinada, transitoria ni permanenta materialias e beins. Igl ei buca lubiu da deponer substanzas prigulusas per igl ambient, da deponer rumien e rumien da pazzals reciclabel. Stabiliments e mesiras sco tetgs da protecziun ni seivs ein lubi, sch'els surveschan directamein a proteger las materialias ed ils beins. Ella zona da deposits eisi medemamein lubiu da pazzar vehichels a motor. Buca lubi ein vinavon stabiliments cun implonts da producziun ni plazs da lavur.

### 3. Parcellas ella zona da mistregn

Las parcellas nr. 3057 e nr. 1916 ein indicadas silla grafica cheusut. Ei setracta d'ina surfatscha da 12'424 m<sup>2</sup>. Il prezi da cumpra offerius dall'ATG schai tier frs. 30.- il meter quadrat, totalmein muntan ils cuosts da cumpra a frs. 372'720.-. Vitier ha la vischnaunca da surprender ils cuosts en connex culla cumpra (cuosts digl uffeci funsil eav.).

L'ATG ei vid cerrar giu ils davos affars administrativs a Tujetsch. Cun la vendita da quellas duas parcellas ei la davosa fatschenta en connex cun la NEAT ventschida. Per la vischnaunca da Tujetsch eisi uss la davosa caschun da comprar las parcellas. Havessen ils gremis cumpetents da sedecider encunter in acquist dallas parcellas, ha l'AlpTransit Gotthard SA previu da vender talas ad in auter interessent. Ord vesta dalla vischnaunca fuss ei donn, sch'ella stuess dar quellas parcellas ord agens mauns, forsa schizun ad ina interpresa d'ordvart. La vischnaunca intenziunescha numnadamein da schar a tscheins quels suloms allas interpresas localas ch'ein numnadamein avisadas urgentamein sin spazi per deponer material e vehichels.

La suprastonza communal e l'AlpTransit Gotthard SA vulan terminar la buna collaboraziun dils davos decennis cun in bien sentiment ed ina buna fatschenta da finiziun. Domisduas partidas speran ferma-mein ch'il cussegl da vischnaunca detti il consentiment per la cumpra dallas parcellas.



**Surfatscha:** nr. 3057 (12'386 m<sup>2</sup>) / nr. 1916 (38 m<sup>2</sup>)

**Zona actuala:** Ulteriur terren communal (parcella nr. 3057 e nr. 1916)

**Prezi da cumpra (offerta):** frs. 372'720 (frs. 30/m<sup>2</sup>) ed ils cuosts en connex cun la cumpra.

### 4. Posiziun dalla suprastonza communal

Igl ei semussau ils davos onns che las interpresas indigenas da construcziun basegnan plaz per deponer material e vehichels ella zona da mistregn. La parcella nr. 3057 vegn gia oz nezegiada sco liug da deposit. Muort quei basegns ei la suprastonza communal perschuidida ch'igl ei necessari da comprar las parcellas per metter a disposiziun talas allas interpresas localas. Per l'ina sa la vischnaunca segidar aschia cun quellas interpresas. Per l'autra setracta ei ord vesta dalla vischnaunca dad ina fatschenta, la quala generescha annualmein in tscheins d'affittaziun. Ord vesta finanziara eisi da menziunar che la vischnaunca dispona davart ils mieds liquids per acquistar las parcellas.


## 5. Propostas

Sin fundament dallas ponderaziuns surnumnadas propona la suprastonza communal al cussegli da vischernaunca:

**da cumprar las parcellas nr. 3057 (12'386 m<sup>2</sup>) e nr. 1916 (38 m<sup>2</sup>) situadas ella zona da mistregn per il prezi da frs. 372'720.- e da surprender ils cuosts en connex cun la cumpra.**

***La fatschenta ei suttamessa al referendum facultativ (art. 17 alinea c dalla constituziun communal).***

### Suprastonza communala Tujetsch



President communal:  
Martin Cavegn



Menader center communal:  
Simon Collenberg